

# Peranan Wakaf Dan Cinta Kemanusiaan Untuk Kesejahteraan Umat

Radin Anis Adlina Radin Hasbani<sup>1</sup>, Syaidatun Nazirah Abu Zahrin<sup>2</sup>, Mohamad Sabri bin Haron<sup>3</sup>,

<sup>1</sup> Institut Islam Hadhari, Universiti Kebangsaan Malaysia, Bangi, Selangor, Malaysia

<sup>2,3</sup> Pusat Citra Universiti, Universiti Kebangsaan Malaysia, Bangi, Selangor, Malaysia

## Progres Artikel

Diterima: 18 Ogos 2016

Disemak: 16 Mac 2017

Diterbit: 2 September 2017

\*Corresponding Author: Radin Anis Adlina Radin Hasbani, Institut Islam Hadhari, Universiti Kebangsaan Malaysia  
Email: [Anisadlina92@gmail.com](mailto:Anisadlina92@gmail.com)

**Abstrak:** Kehadiran Islam adalah bertujuan untuk memenuhi semua tuntutan kehidupan. Wakaf adalah salah satu elemen yang dianggap sebagai satu pemberian kepada masyarakat. Wakaf termasuk dalam aspek filantropi dan cinta kemanusiaan dan berkait antara satu sama lain kerana ia adalah satu cabang yang dilihat dalam Islam menjurus kepada sifat keprihatinan sesama muslim. Selain itu, aspek Filantropi atau kedermawanan juga menghubungkan cinta kemanusiaan yang menjadi asas kepada titik tolak kedamaian semua bangsa di seluruh dunia. Perbincangan semasa mengenai cinta kemanusiaan atau filantropi masih kabur dalam pandangan umat Islam. Dengan adanya badan-badan organisasi wakaf dan pertubuhan bukan kerajaan (NGO) yang ditubuhkan sekaligus dapat membantu ekonomi umat Islam ke arah yang lebih baik. Apabila wakaf dan cinta kemanusiaan dapat dihayati sepenuhnya, maka ia dapat menyumbang kepada kesejahteraan ummah. Pengkaji menggunakan kaedah kualitatif secara analisis tematik berkaitan Wakaf. Oleh itu, pengkaji akan menganalisis bagaimana peranan badan-badan kerajaan dan badan-badan bukan kerajaan memainkan peranan dalam membantu masyarakat menjamin kesejahteraan ummah.

**Kata kunci:** Cinta kemanusiaan, Filantropi, Kedermawanan, Keprihatinan, Wakaf.

**Abstract:** Islam is aimed at fulfilling all demands of life. Waqf is one of the elements considered as a gift to the community. Waqf included in the aspects of philanthropy and love of humanity and respect each other because it is a part of the concerns towards fellow Muslims. In addition to that, philanthropy also links humanity love as a basis of peace of all nations. However, current discussions on humanitarian or philanthropic remains opaque among Muslims. Using qualitative methods in a thematic analysis of Waqf, this paper analyzed to which extent government agencies and non-governmental organizations play their roles in helping the society to ensure the well-being of the ummah.

**Keywords:** Humanity, Philanthropy, Philanthropist, Waqf.

## Pengenalan

Perkembangan wakaf bermula pada awal era Islam ketika Rasulullah SAW berhijrah ke Madinah. Sejarah peradaban Islam telah membuktikan bahawa peranan wakaf yang begitu signifikan terhadap pembinaan peradaban serta kekayaan milik umat Islam di seluruh dunia semenjak zaman Nabi Muhammad SAW sehingga

hari ini. Sejak dahulu lagi, institusi wakaf berperanan dalam menyediakan kemudahan bagi memenuhi tuntutan dan keperluan sosial seperti pembinaan infrastruktur untuk kegunaan masyarakat seperti hospital, masjid, rumah kebajikan anak-anak yatim dan orang tua serta penyediaan bekalan air, dan juga untuk kegunaan aktiviti keagamaan seperti tanah kubur pembinaan masjid, madrasah dan sekolah agama. Wakaf juga berperanan

membentuk diri setiap Muslim itu untuk memahami dan menyelami kehidupan umat Islam yang lebih memerlukan kehidupan yang lebih baik, malah menjadikan diri untuk lebih sentiasa bersyukur dengan apa yang dimiliki. Selain itu, institusi wakaf dilihat mampu menaik taraf sistem kehidupan umat Islam, sedangkan sikap sesetengah masyarakat zaman kini kurang mendalami bahkan mengambil sikap sambil lewa tentang institusi wakaf berkaitan pelbagai aspek yang pada hakikatnya dapat membantu insan yang memerlukan. Ini disebabkan oleh faktor badan-badan wakaf ini kurang dikenali bahkan tidak sampai kepada masyarakat tentang peranan sebenar wakaf untuk keperluan jangka panjang di samping institusi wakaf juga dapat membantu umat Islam dalam menyumbang harta mereka ke jalan yang lebih selamat dan diredai Allah SWT serta akan kekal berterusan meskipun penyumbang telah meninggal dunia. Wakaf sangat penting untuk kemaslahatan umat Islam kerana perkara ini sangat dititikberatkan dalam ajaran Islam demi menjamin ekonomi dan kebajikan umat Islam.

Oleh itu, peranan wakaf dan cinta kemanusiaan merupakan wasilah yang sangat berkait rapat. Ini kerana cinta kemanusiaan terbentuk daripada nilai-nilai yang baik yang terbit dari hati seorang manusia dan terbit daripada percakapan dan perbuatan seharian. Dengan itu, artikel ini akan merungkai sejauh mana peranan wakaf mampu diterapkan dalam cinta kemanusiaan untuk kesejahteraan umat. Justeru itu diharapkan institusi wakaf yang telah diiktiraf mampu mengkaji semula dan merancang strategi demi menjamin kemaslahatan umat Islam supaya lebih terjamin di masa akan datang dan dapat mengikis salah faham masyarakat khususnya di kalangan umat Islam tentang kelebihan wakaf atau sifat kedermawanan dalam perkara yang diharuskan.

### Metodologi Kajian

Metodologi kajian ini berdasarkan reka bentuk kajian, kaedah pengumpulan data dan kaedah penganalisan data. Selain melakukan penganalisan menerusi badan-badan wakaf yang terlibat dalam menyumbang kepada cinta kemanusiaan untuk kesejahteraan umat, jangkakan hasil kajian mensasarkan badan-badan wakaf yang terlibat dengan pembahagian wakaf seharusnya mengambil kajian ini sebagai satu perkara yang serius dan mampu berusaha membuat yang terbaik demi kemashalatan umat. Ini juga dapat membantu pembangunan ekonomi masyarakat khususnya Islam.

### Definisi Konsep Wakaf

Menurut Kamus Dewan edisi Keempat (2010) wakaf membawa maksud sesuatu yang diberikan untuk kegunaan orang ramai (sebagai derma) atau sesuatu yang diberikan dan diperuntukkan bagi keperluan yang berkaitan dengan agama Islam. Wakaf dari segi bahasa bermaksud terhenti atau tertahan (Ahmad Shaiful Anuar Ahmad Shukor 2015). Dari segi istilah pula bermaksud menahan sesuatu harta seseorang untuk dimanfaatkan

oleh orang lain. Harta yang diwakafkan hendaklah berada dalam keadaan yang baik, kekal dan tujuan melakukan wakaf adalah untuk mendekatkan diri kepada Allah SWT dan memberi kebajikan kepada orang lain. Contoh kepada perkembangan awal wakaf ialah pembinaan Masjid Quba' yang merupakan masjid pertama dibina oleh Rasulullah SAW sebagai sebahagian daripada siri penting dalam misi perintah hijrah ke Madinah. Masjid ini menjadi bukti kekuatan dalam amalan sejarah wakaf Rasulullah SAW. Tambahan pula, amalan ini disebut oleh Allah SWT dalam Surah al-Tawbah ayat 108 yang bermaksud:

*“Sesungguhnya masjid (Masjid Quba’) yang didirikan berasaskan takwa semenjak hari pertama itu lebih patut kamu bersembahyang di dalamnya kerana di dalamnya ada orang yang ingin membersihkan diri dan Allah sangat menyukai orang yang sentiasa bersih”.*

Hal ini membuktikan bahawa wakaf mula diperkenalkan semasa zaman pemerintahan Rasulullah SAW pada tahun pertama hijrah (Razali Othman, 2011). Rasulullah SAW juga turut membangunkan Masjid Nabawi di Madinah selepas enam bulan pembinaan Masjid Quba. (Moh. E. Ayub, 1993). Dirwayatkan bahawa Baginda Rasulullah SAW telah membeli tanah bagi pembinaan masjid tersebut daripada saudara yatim iaitu Sahl dan Suhail dengan harga 100 dirham. (S. Ameer Ali, 1992). Langkah ini menunjukkan bahawa Baginda Rasulullah SAW telah mewakafkan tanahnya untuk pembangunan masjid. Masjid tersebut telah menjadi institusi pendidikan pada masa dahulu. Ciri kekekalan harta wakaf dengan hanya mengambil manfaatnya sahaja untuk disalurkan bagi tujuan kebajikan membezakan wakaf dengan konsep infaq yang lain seperti hibah, sedekah dan hadiah.

Wakaf bertindak sebagai alat jaminan keselamatan sosioekonomi (Kahf, 1998) melalui agihan dan perkongsian manfaat kepada golongan miskin setanding dengan peranan yang dimainkan oleh zakat. Justeru dengan adanya pusat zakat dapat membuka mata masyarakat dalam menderma atau mewakafkan harta-harta mereka kepada umat Islam dan pihak yang diberi amanah dalam menangani isu ini yang sememangnya masih lagi di dalam keadaan yang memerlukan keperluan orang ramai untuk turun padang menyelesaikan permasalahan yang semakin meruncing dan membimbangkan.

### Definisi Cinta Kemanusiaan

Perkataan *Filantropi* berasal dari perkataan Yunani *philos* yang bermaksud cinta atau *Filantropi* termasuk juga dalam cinta kemanusiaan Islam kerana agama yang mengajarkan manusia untuk saling menyayangi, mengasihi dan menyantuni sesama manusia. Konsep *Filantropi* ini termasuklah berinfaq, bersedekah, berzakat, dan berwakaf. hal ini berkaitan dalam kehidupan sosial, ekonomi, pendidikan, dan aspek kehidupan lainnya. Terdapat beberapa ayat di dalam surah al-Qur'an yang menunjukkan atas perintah tersebut

seperti dalam surat al-Taubah ayat 103, yang bermaksud, “*Ambillah zakat dari sebahagian harta mereka, dengan zakat itu kamu membersihkan dan menyucikan mereka, dan berdoalah untuk mereka. Sesungguhnya doa kamu itu menjadi ketentraman jiwa bagi mereka. Dan Allah Maha Mendengar lagi Maha Mengetahui*”.

Cinta dan *anthropos* bermaksud lelaki atau manusia. Secara teknikal, dermawan boleh takrifkan sebagai "kerana mencintai manusia atau merasa cinta atau kasih sayang sesama manusia". Melalui cinta ini, manusia dipaksa untuk menghulurkan tangan, kedua-dua bahan dan bukan bahan, kepada mereka yang memerlukan atau untuk tujuan yang berfaedah kepada manusia. Ia bukan sahaja melibatkan pemberian wang dan barang-barang keperluan, tetapi juga menyediakan masa dan tenaga. Tujuannya adalah bukan sahaja untuk membantu mereka yang memerlukan, tetapi juga untuk tujuan lain yang boleh membawa kebaikan kepada semua orang. Kedermawanan mempunyai tiga ciri utama. Pertama, kebimbangan untuk kesejahteraan orang lain, termasuk kesejahteraan makhluk lain seperti haiwan dan alam sekitar. Kedua, kebimbangan khususnya kepada mereka yang berada dalam kesusahan. Ketiga, bantuan secara sukarela tanpa mengharap balasan (Siti Fatimah, 2013).

#### **Definisi Filantropi dalam Konteks Islam**

Menurut Norajila Che Man 2014, Kata filantropi (*philanthropy*) berasal daripada bahasa Greek, *Philos* bermaksud love, cinta atau sayang dan *anthropos* bermaksud man atau manusia. Manakala filantropi pula bermaksud for the love of mankind atau demi rasa cinta atau sayang sesama manusia. Akibat daripada rasa sayang inilah, kita terdorong untuk menghulurkan bantuan, baik dalam bentuk material mahupun bukan material, kepada mereka yang memerlukan atau untuk sesuatu tujuan yang mendatangkan manfaat kepada manusia sejagat.

Dalam erti kata lain, filantropi bermaksud kedermawanan dalam erti yang luas. Ia bukan hanya melibatkan pemberian wang ringgit dan barang-barang keperluan, tetapi juga memberikan masa dan tenaga. Tujuannya pula bukanlah hanya untuk membantu mereka yang memerlukan, tetapi juga untuk tujuan-tujuan lain yang boleh mendatangkan kebaikan kepada semua manusia. (Norajila Che Man 2014) Filantropi mempunyai tiga ciri utama. Pertama keprihatinan terhadap kesejahteraan orang lain, termasuklah kesejahteraan makhluk lain seperti haiwan dan alam sekitar. Kedua, keprihatinan itu khususnya kepada mereka yang berada di dalam kesusahan. Ketiga, bantuan secara sukarela adalah tanpa mengharap apa-apa balasan. (Siti Fatimah Abd Rahman 2013)

#### **Peranan Wakaf**

Wakaf merupakan manifestasi sedekah jariah yang melibatkan pengorbanan harta benda oleh individu Muslim dengan menginfakkan harta secara berkekalan untuk kebajikan (Abu Zuhrah, 1972:5) atas dasar *qurbah*

bagi mendekatkan diri kepada Allah SWT (Al-Zuhayli, 1987:134-35). Hakikatnya pensyariatkan wakaf menjangkau konsep pengabdian diri terhadap Allah SWT kerana wakaf turut memainkan peranan yang penting dalam konteks muamalah sesama insan berlandaskan prinsip *mahabbah* (kasih sayang), kerjasama dan *ta'awun* (bantu-membantu) (Syahnaz, 2008:51). Lantaran peranan wakaf yang begitu signifikan, wakaf telah menjadi salah satu komponen penting yang mendasari sektor *ijtimai'* (kemasyarakatan) dalam teori sistem ekonomi Islam (Surtahman Kastin & Sanep Ahmad, 2010:53).

Wakaf bertindak sebagai alat jaminan keselamatan sosio ekonomi (Kahf, 1998:9) melalui agihan dan perkongsian manfaat kepada golongan miskin setanding dengan peranan yang dimainkan oleh zakat. Amalan berwakaf bukan sahaja menyumbang kebaikan dan kemaslahatan ummah di dunia bahkan pewakaf juga dijanjikan ganjaran pahala yang berkekalan di akhirat (Imam Muslim, 1997:25).

Oleh itu, wakaf sebagai laluan atau wasilah dalam pembangunan ekonomi umat Islam seharusnya dititikberatkan oleh semua pihak. Wakaf sebagai satu ibadat yang digalakkan untuk mendekatkan diri kepada Allah SWT. Dalam masa yang sama wakaf berperanan dalam pembangunan ekonomi secara langsung. Wakaf berperanan dalam pembangunan ekonomi dengan cara menyediakan kemudahan-kemudahan seperti kesihatan, pendidikan dan ibadat khusus. Apabila masyarakat mendapat kemudahan menerima rawatan kesihatan, pendidikan dan kemahiran, maka dari sudut insani ini bermakna mereka juga telah membangun. Ini kerana apabila mereka sihat dan terdidik serta mempunyai kemahiran, ini membuka peluang untuk meningkatkan juga taraf ekonomi keluarga mereka. Begitu juga dengan adanya tempat-tempat ibadat yang membolehkan mereka berjemaah, menunaikan ibadat, menuntut ilmu dan melakukan kegiatan-kegiatan yang menyuburkan rohani, akan turut membangunkan kemanusiaan mereka. Ini kerana pembangunan ekonomi tidak sekadar diukur dari pembangunan bersifat fizikal, malah pembangunan insan juga merupakan sebahagian daripada keperluan dalam pembangunan ekonomi.

#### **Cinta Kemanusiaan Menurut Konteks Islam**

Dengan adanya cinta kemanusiaan yang melibatkan badan-badan organisasi yang terlibat mampu melibatkan diri dalam cinta kemanusiaan sekaligus boleh menjadikan kesejahteraan umat lebih dilindungi dan kemanusiaan adalah nilai-nilai yang baik yang terbit dari hati seorang manusia dan terjelma dalam percakapan dan perbuatan seharian. Nilai-nilai ini mampu membentuk manusia menjadi insan yang mulia, beriman dan berakhlak serta sentiasa bahagia dalam kehidupan di dunia dan akhirat. Menurut tokoh agama Profesor Dr. Yusuf al-Qardhawi dalam bukunya, *Ciri-Ciri Masyarakat Islam Yang Kita Idamkan* (2000), nilai-nilai kemanusiaan itu mesti dipandu oleh ilmu, amal dan iman. Di samping itu, manusia perlu hidup dalam perasaan kasih sayang dan

persaudaraan dengan mengutamakan orang lain. Menurutny lagi, nilai-nilai kemanusiaan juga dipandu dengan kesatuan yang menjadi keperluan persaudaraan, saling menolong, bantu-membantu dan sayang-menyayangi antara satu sama lain dalam kehidupan bermasyarakat. Oleh itu, manusia terutamanya umat Islam perlu kembali kepada asas-asas ini bagi mendidik hati dan jiwa dengan nilai-nilai kemanusiaan iaitu mengutamakan kasih sayang dan nilai persaudaraan yang akrab dalam kehidupan bermasyarakat.

### **Definisi Kedermawanan**

Dermawan boleh dikaitkan dengan Filantropi atau ada kata lain sifat pemurah yang terbit dari perasaan atau hati manusia itu sendiri. Kerja sukarela berasal dari perkataan sukarelawan, iaitu seseorang yang berbakti atau memberikan khidmat dan sumbangan secara sukarela, iaitu dengan rela hati tanpa paksaan serta niat yang ikhlas tanpa mengharapkan ganjaran material (Azizan Bahari, 2003). Sifat altruisme pula membawa maksud orang yang tidak kedekut; orang yang suka atau selalu memberi. Selain itu sikap dermawan ini kita dapat jadikan sebagai contoh pada zaman dahulu iaitu pada zaman Rasulullah SAW di mana ramai para sahabat yang dikategorikan sebagai dermawan yang sanggup mendermakan atau berjihad dengan menggunakan kekayaan atau harta yang mereka miliki demi menegakkan Islam. Di barat mereka juga lebih mementingkan dermawan dan menganggap sikap dermawan juga adalah sikap yang sangat bagus untuk dipraktikkan.

Kedermawanan merupakan prinsip penting dalam Islam kerana keprihatinan terhadap golongan yang memerlukan serta zakat adalah salah satu daripada lima rukun yang membentuk asas-asas Islam. Dalam kedermawanan Islam merujuk kepada barang-barang persendirian diberikan mengikut ketetapan Islam pemberian amal untuk tujuan awam. Kedermawanan adalah berdasarkan kepada prinsip bahawa apa yang di bumi milik Allah s.w.t dan manusia hanya pemegang amanah bagi semua kekayaan itu. Allah s.w.t kurniakan beberapa harta pada beberapa agar mereka dapat bersyukur dan membantu orang lain dalam amal. Oleh itu manusia mesti menggunakan dan membelanjakan harta dengan bijak.

Terdapat dua jenis alat pengukuran dermawan Islam yang wajib dan sukarela. kedermawanan wajib terdiri daripada zakat (sedekah) manakala, kedermawanan sukarela termasuk semua pemberian oleh individu yang boleh memberi manfaat kepada orang lain seperti sedekah dan lain-lain. Selain itu, dalam al-Quran Allah telah menurunkan beberapa istilah yang merujuk kepada sifat kedermawanan. Ia dinyatakan di dalam pelbagai segi. Istilah yang digunakan adalah infak, sedekah, amal, kebajikan, badan amal, pengorbanan, belas kasihan, takaful, akan, jihad dan *taawun* (Hassan Bahrom et.al, 2013).

## **Peranan Badan Wakaf Dan Badan-Badan Kerajaan Dan Bukan Kerajaan Di Malaysia**

### **Yayasan Wakaf Malaysia (YWM)**

Yayasan Waqaf Malaysia (YWM) merupakan sebuah entiti wakaf di peringkat kebangsaan yang ditubuhkan atas inisiatif Jabatan Wakaf, Zakat dan Haji (JAWHAR), Jabatan Perdana Menteri. Ditubuhkan secara rasmi pada 23 Julai 2008, YWM berperanan dalam menggembeng sumber-sumber wakaf dan menjadi pelengkap kepada usaha Majlis-majlis Agama Islam Negeri (MAIN) dalam membangunkan hartanah wakaf di Malaysia. (Kejayaan Institusi-Institusi Agama Di Bawah Menteri Di Jabatan Perdana Menteri).

### **World Zakat Organization (WZO)**

Inisiatif Penubuhan WZO yang sebelum ini disebut sebagai International Zakat Organization (IZO) telah dipersetujui oleh Jemaah Menteri pada 4 April 2007. WZO ditubuhkan berdasarkan saranan Mantan Perdana Menteri YABhg Tun Abdullah Hj Ahmad Badawi sewaktu Persidangan Luar Biasa Pertubuhan Persidangan Islam (OIC) di Mekah Al-Mukaramah pada 8 Disember 2005. Beliau menyatakan perlu wujudnya satu dana khas bersumberkan Zakat bagi menangani isu kemiskinan di Negara-negara OIC. (Kejayaan Institusi-Institusi Agama Di Bawah Menteri Di Jabatan Perdana Menteri).

### **Yayasan Amal Malaysia (Amal Malaysia)**

Yayasan Amal Malaysia (Amal Malaysia) merupakan sebuah Badan Bukan Kerajaan (NGO) Islam yang berdaftar secara sah telah ditubuhkan pada 30 Mei 2001. Cadangan penubuhan Amal Malaysia dicetuskan oleh presidennya sendiri, Hj. Husin Ismail melalui kertas cadangan penubuhannya pada tahun 2001. Hasil perbincangan, kerjasama dan buah fikiran beberapa kalangan aktivis masyarakat seperti Hj Jamuliddin Elias (Timbalan Presiden), Hj. Othman Sodikin (Ahli Jawatankuasa), Raja Iskandar Raja Ahmad, Abd Hamid Seman (Ketua Setiausaha) dan lain-lain lagi telah mencetuskan penubuhan sebuah Badan Bukan Kerajaan (NGO) yang dinamakan Yayasan Amal Malaysia (Amal Malaysia). Ia bukan bergerak atas nama amal kebajikan semata-mata tetapi juga sebagai pendakwah. Ini kerana melalui amal kebajikan, anggota Amal Malaysia berhadapan terus dengan ahli masyarakat dan kesempatan itu diambil peluang untuk menggunakan kemahiran berdakwah secara personaliti serta amalan. Pendekatan berkhidmat sambil berdakwah adalah pendekatan yang terpuji bagi menonjolkan kesyumulan dan keluasan Islam. Secara jelas, kebaktiannya diterima oleh masyarakat setempat dan antarabangsa tanpa sebarang prejudis. Ini kerana Amal Malaysia tidak terikat dengan keterbatasan ruang lingkup yang sempit serta tidak dibatasi oleh sempadan geografi dan juga keterikatan bangsa dan agama. Gerak kerjanya termasuklah misi bantuan, perubahan, pendidikan dan dakwah, latihan, penyelidikan,

pembangunan remaja, penerbitan dan hubungan luar (Najahudin Lateh 2009).

### **Muslim Care Malaysia Society**

Menjadi tanggungjawab untuk kita membantu sesama Islam. Keprihatinan ini menjadi medan buat Pertubuhan Penyayang Islam Malaysia (Muslim Care Malaysia Society) untuk menabur bakti demi melihat saudara sesama Muslim menjalani kehidupan lebih sejahtera. pertubuhan ini telah berbakti kepada golongan memerlukan sejak 2006 dan bertapak lebih kurang enam tahun lalu untuk menyalurkan bantuan kemanusiaan tanpa mengira sempadan kenegaraan, bangsa dan agama. Penubuhan persatuan ini ditubuhkan adalah atas rasa tanggungjawab sebagai Muslim untuk membantu mangsa gempa bumi di Iran dan Turki beberapa tahun lalu, kerana pada waktu itu sumbangan derma orang ramai dilakukan secara tidak tersusun. Matlamat persatuan ini secara langsung menjadi misi pertubuhan yang bercita-cita menjadi pertubuhan bukan kerajaan (NGO) yang amanah, berkeupayaan melaksanakan tanggungjawab serta memupuk semangat profesionalisme yang progresif, inovatif, dan proaktif dalam menghulurkan bantuan kepada manusia sejagat (*Muslim Care Online*).

### **Kesejahteraan Ummah Melalui Wakaf Dan Cinta Kemanusiaan**

Cinta dan kemanusiaan adalah satu kata gabungan yang membawa maksud nilai-nilai murni, yang merujuk kepada cinta kepada sesama manusia, ia adalah satu sifat yang baik dan harus ada pada setiap diri yang bergelar manusia. Ini demi memastikan hubungan sesama manusia itu tidak terjejas walaupun berlainan agama, bangsa dan warna kulit. Definisi cinta dalam Kamus Dewan Edisi Keempat (2010) bermaksud perasaan kasih sayang dan kemanusiaan pula bermaksud hal yang berkaitan dengan manusia. Cinta juga merupakan suatu abstrak dan subjektif dan boleh dirasakan dan diperolehi oleh setiap manusia, namun bagaimana cinta itu digunakan bergantung kepada diri setiap individu.

Kesejahteraan umat itu wujud apabila sifat cinta kemanusiaan itu muncul dan melalui amalan berwakaf elemen ini hadir dari jiwa yang bersih. Jiwa yang bersih hadir apabila hati sentiasa menunjukkan sikap ingin menderma melalui amalan berwakaf. Rasulullah SAW bersabda yang bermaksud: “Apabila anak Adam (manusia) wafat, maka terputuslah semua (pahala) amal perbuatannya kecuali tiga macam perbuatan, yaitu sedekah jariah, ilmu yang bermanfaat, dan anak saleh yang mendoakannya” (HR. Muslim). Justeru itu, amalan berwakaf ini mampu menjamin kehidupan setelah kematian kelak. Hadis di atas telah menerangkan bahawa pentingnya sedekah iaitu amal jariah yang berpanjangan supaya dapat menolong kita apabila di akhirat kelak. Terdapat beberapa faktor yang perlu dipenuhi antaranya ialah :

### **Keperluan kewangan yang dipenuhi**

Dewasa ini, masyarakat sering mengalami masalah kewangan yang teruk akibat dari pertumbuhan ekonomi yang pesat dalam negara yang membangun. Dengan sikap tidak pandai menyimpan wang dengan bijak, maka timbulnya golongan muda yang muflis akibat beban hutang, pesakit yang gagal mendapatkan rawatan akibat kos perubatan yang terlalu tinggi, dan pesara yang mengalami kesempitan hidup akibat kurangnya simpanan untuk hari tua. Dengan perancangan kewangan yang berhemah, kita dapat membentuk keluarga yang sejahtera dan stabil. Pendapatan yang sedikit tetapi dirancang penggunaannya mengikut keutamaan akan lebih berkesan dalam memenuhi keperluan diri dan keluarga, berbanding dengan pendapatan yang banyak tetapi dibelanjakan dengan boros. Dalam setiap peringkat kehidupan, dari seusia kanak-kanak hinggalah dewasa pastinya ada keperluan kewangan yang perlu dipenuhi, lantas memerlukan perancangan sewajarnya. Kewangan merupakan satu intipati yang perlu ada pada setiap manusia dalam membina kehidupan yang lebih terjamin di masa hadapan. Kewangan juga mampu menjadikan manusia lalai kerana apabila wang telah menjadi sumber utama dalam mencari rezeki digunakan tanpa mengambil kira keredaan Allah SWT maka hidup tidak akan diberkati.

### **Kegiatan Ekonomi Yang Dapat Digerakkan**

Ekonomi wakaf merupakan roda penggerak pembangunan dalam bidang ekonomi, pelajaran, sosial, kesihatan yang berkembang pesat di dunia Islam. Kita dapati ramai dalam kalangan umat Islam yang mewakafkan masjid, institusi pendidikan, hospital dan lain-lain. Peranan badan-badan wakaf atau badan –badan kebajikan yang ditubuhkan membantu masyarakat atau mereka yang betul-betul memerlukan kewangan ialah seperti pembinaan rumah. Dengan adanya wakaf tunai, sekaligus mampu mengerakkan kegiatan ekonomi yang tertanggung disebabkan oleh masalah kewangan yang memerlukan mereka untuk mendapatkan bantuan wakaf. Sebagai contoh, isu pembinaan maahad tahfiz atau sekolah tahfiz yang ingin dibangunkan atas tanah yang telah diwakafkan tertanggung agak lama disebabkan tiada wang untuk membayar pekerja yang namun tiada peruntukan kewangan yang dikhususkan oleh Majlis Agama Islam negeri atau pihak yang berkaitan. Selain itu, isu ini sudah selalu diperkatakan namun ramai pihak berwajib tidak memandang berat akan isu ini sehingga mengakibatkan tertanggungnya pembinaan yang melibatkan jutaan ringgit.

### **Bantuan Kepada Hospital, Pusat-Pusat Pendidikan Dan Badan Kebajikan**

Wakaf juga memudahkan kepada sektor pembangunan hospital, pusat-pusat pendidikan dan badan kebajikan. Dengan bantuan dari wakaf tunai yang digerakkan mampu membaik pulih pusat-pusat pendidikan yang musnah akibat kebakaran atau bencana yang datang.

Amalan berwakaf juga penggerak sektor pembangunan negara. Dengan adanya dana wakaf maka badan-badan kebajikan yang sedang membangun boleh berkhidmat dengan lebih baik menerusi pemberian wakaf daripada masyarakat muslim yang menderma tidak kira bentuk wakaf tersebut berunsur wang mahupun berbentuk barangan. Bantuan tersebut juga membolehkan badan-badan kebajikan boleh melakukan tugas mereka dengan mudah dan sumbangan tersebut sampai kepada mereka yang memerlukan. Pusat-pusat pendidikan yang semakin hari semakin membangun seperti cendawan tumbuh selepas hujan turut memerlukan bantuan wakaf untuk memudahkan lagi proses pembinaan supaya proses pembelajaran dapat dilakukan dengan lancar tanpa berlakunya sebarang gangguan.

### **Penubuhan Universiti Dan Kelangsungan Dana Wakaf Universiti**

Di Morocco pula, Pertubuhan Pendidikan, Saintifik dan Kebudayaan Pertubuhan Bangsa Bersatu (UNESCO) telah mengiktiraf Al-Qarawiyyin sebagai institusi pertama yang mengeluarkan ijazah lantas diiktiraf sebagai universiti yang pertama di dunia. Kelangsungan daripada penubuhan pusat pendidikan tersebut maka tertubuhlah universiti Al-Azhar di Mesir. Selain itu, kelangsungan dana wakaf universiti perlu ada sebagai simpanan asas jika berlakunya kekangan dalam kewangan. Ini kerana ekoran bajet berkaitan kewangan yang berkurangan oleh kerajaan terhadap semua Institusi Pengajian Tinggi Awam, menyebabkan semua Istitusi perlu memikirkan cara untuk memajukan sendiri universiti mereka. Sebagai contoh menganjurkan program wakaf dana pendidikan tunai menerusi program yang dianjurkan di universiti untuk menyalurkan sumbangan terhadap dana wakaf Universiti. Selain itu, universiti awam masing-masing boleh membangunkan aset mereka yang sedia ada untuk tujuan wakaf dengan setiap manfaat keuntungan disalurkan kepada tabung dana pendidikan (Utusan Online 2016).

### **Kemajuan Harta Muslim**

Kemajuan harta Muslim disebabkan oleh badan-badan organisasi wakaf iaitu YWM yang telah banyak membantu pembangunan dan kebajikan umat Islam. 5 Unit Bazar Wakaf Rakyat di Selangor antaranya ialah di Masjid Al-Hasanah, Bandar Baru Bangi, 5 Unit Bazar Wakaf Rakyat di Masjid Jamek Daerah Hulu Langat, Pekan Kajang, 5 Unit Bazar Wakaf Rakyat di Masjid As-Solihin, Kg. Kanchong Darat, Banting, 5 Unit Bazar Wakaf Rakyat di Masjid Al-Azim, Pandan Indah, 5 Unit Bazar Wakaf Rakyat di Masjid Al-Raudhah, Pekan Tanjung Karang. Ini telah membuktikan usaha YWM untuk turun padang membantu kebajikan dan ekonomi umat Islam lebih terjamin dan membantu meningkatkan produk muslim supaya lebih dikenali di seantara dunia. (Yayasan Waqaf Malaysia).

Selain itu, Majlis Agama Islam Wilayah Persekutuan menubuhkan anak syarikat milik penuhnya

iaitu Pusat Wakaf MAIWP Sdn. Bhd. yang berfungsi untuk memberi fokus kepada pengurusan hal ehwal harta wakaf agar ia lebih komprehensif dan teratur. Malah, penubuhan syarikat itu juga akan membolehkan kempen dan promosi tentang wakaf dapat dilaksanakan secara lebih sistematik dan berkesan. Ini juga membolehkan MAIWP mempelawa seberapa banyak syarikat-syarikat korporat dalam menjalankan sebarang usahasama dan perkongsian dalam penjaan harta wakaf. Harta yang diserahkan kepada MAIWP sebagai harta wakaf akan kekal menjadi pegangan umat Islam selama-lama dan hasil pewakafan tersebut dapat dimanfaatkan untuk kebajikan dan pembangunan sosio ekonomi umat Islam. Beri manfaat kepada umat Islam Bagi wakaf tunai pula akan ditukarkan kepada harta kekal yang mana hasil manfaat wakaf tunai akan digunakan untuk kebajikan dan pembangunan ummah. Ada juga wakaf tunai itu disalurkan untuk kepentingan agama dan pembangunan sosio-ekonomi ummah seperti pembinaan sekolah, masjid, surau dan sebagainya. Manakala terdapat satu lagi terimaan wakaf yang menjadi kebanggaan MAIWP ialah pewakafan dua bidang hartanah seluas 1.7183 ekar yang terletak di atasnya sebuah banglo dua tingkat dan kebun buah-buahan. Hartanah ini terletak di Sungai Penchala, Kuala Lumpur dan ia diwakafkan kepada MAIWP sebagai Pusat Pengajian Warga Emas yang dikenali sebagai Darul Ilmi. Pusat pengajian itu membolehkan warga emas mendalami ilmu agama secara kaedah pengajian pondok moden. Malah, ia juga turut menyediakan tempat tinggal untuk warga emas sepanjang tempoh pengajian mereka (Utusan Online Mac 2016).

### **Peninggalan Harta Wakaf**

Salah satu harta wakaf yang dilihat masih diguna sehingga sekarang ialah Hotel Uthman Affan yang dahulunya hanyalah telaga wakaf yang didermakan untuk kegunaan penduduk setempat. namun setelah itu, tumbuhlah di sekitar telaga tersebut beberapa pokok kurma dan terus membiak. Kemudian Daulah Khalifah Uthmaniyah (empayar kerajaan Uthmaniyah Turki) memeliharanya hingga semakin berkembang biak dan seterusnya juga turut dipelihara oleh kerajaan Arab Saudi sehingga mencapai jumlah 1550 batang pokok dan berbuah dengan sangat lebat. Mereka telah menjaga ladang kurma dan hasil jualan kurma-kurma itu serta menyimpannya sehinggalah wujudnya kerajaan Saudi. Ladang kurma tersebut kemudiannya dipajakkan kepada Kementerian Pertanian cawangan Madinah sejak 1372 masihi dengan kontrak tahunan diperbaharui pada awal setiap tahun. Seterusnya kerajaan Arab Saudi, melalui Kementerian Pertanian Saudi menjual hasil ladang kurma ini ke pasaran sehingga banyak wang yang terkumpul. Setengah daripada keuntungan itu diinfakkan untuk anak-anak yatim dan fakir miskin. Manakala separuh lagi dibuat tabungan dan disimpan dalam bentuk akaun khas milik beliau di salah sebuah bank atas nama Uthman bin Affan, di bawah pengawasan Kementerian Wakaf Arab Saudi. Begitulah seterusnya, sedekah Sayyidina Uthman bin

Affan RA terus bercambah dan membiak membuak-buak tanpa hentinya sehingga dana terkumpul yang di bank itu mampu untuk membeli sebidang tanah dan membangunkan hotel yang cukup besar di salah satu tempat strategik berhampiran Masjid Nabawi. Bangunan hotel itu sudah pada tahap penyelesaian dan akan disewakan sebagai hotel 5 bintang. Dianggarkan keuntungannya sekitar RM50 juta setahun. Setengahnya untuk anak-anak yatim dan fakir miskin dan setengah lagi tetap disimpan dan ditabung di bank atas nama Sayyidina Uthman bin Affan Radhiyallahu anhu.

### Penubuhan Al-Rajhi Bank

Bank Al-Rajhi telah mempunyai sebanyak 570 cawangan di seluruh dunia. Pada Oktober 2006, Bank Al Rajhi telah membuka cawangannya di Malaysia dan sebanyak 25 cawangan bank nya sudah dibuka sehingga kini, 15 di Lembah Kelang, satu masing-masing di Johor Bahru, Melaka, Penang, Ipoh, Kota Bharu, Kuantan, Kuching, Sg. Petani dan Kota Kinabalu. Bank Al Rajhi juga telah dianugerahkan beberapa anugerah di peringkat antarabangsa. Selain itu, Sulaiman Al Rajhi juga telah menubuhkan Universiti Sulaiman Al-Rajhi yang fokus utamanya adalah untuk melahirkan pelajar-pelajar dalam pelbagai bidang antaranya kesihatan dan perbankan Islam. Kelahiran pelajar daripada universiti yang terletak di daerah Qassim, Arab Saudi ini juga dilihat dapat memenuhi keperluan tenaga kerja yang diperlukan oleh negara Arab Saudi. Al-Rajhi Bank (Malaysia) menyediakan pembiayaan sebanyak RM325,000 untuk dua pusat pendidikan di bawah pengurusan Yayasan Salam. Pusat pendidikan berkenaan ialah Taska Baitul Amal serta Pusat Jagaan Baitul Amal dan pembiayaan itu di bawah Program Kanak-kanak Baitul Amal tanggungjawab sosial korporat (CSR) bank untuk 70 kanak-kanak dari umur dua bulan hingga enam tahun. Al-Rajhi Bank adalah kumpulan perbankan Islam dengan rangkaian lebih 700 cawangan dan pusat penghantaran di Arab Saudi serta mempunyai 24 cawangan di Malaysia (Utusan Online Jun 2015).

### Kesimpulan

Wakaf sudah lama diperkenalkan sejak zaman Rasulullah S.A.W bersama para sahabat yang lain yang kebanyakan mendermakan sebahagian harta untuk berperang di Jalan Allah. Kesan daripada itu, maka terbinalah Masjid Quba yang dahulunya hanyalah dibuat daripada pelepah tamar sehingga ke hari ini masih digunakan oleh Umat Islam. Wakaf juga adalah salah satu kebajikan yang pahalanya mengalir kepada mereka yang berwakaf walaupun sudah meninggal dunia. Dengan adanya bantuan wakaf malah dapat membantu umat Islam dalam menyelesaikan masalah mereka pada hari ini. Selain itu, Peranan Wakaf dan Cinta Kemanusiaan seharusnya menjadi akar tunjang kepada kesejahteraan Ummah kerana wakaf merupakan salah satu faktor kepada pembangunan dan kebajikan masyarakat khususnya Umat Islam. Dengan adanya wakaf,

sifat diri seseorang itu boleh dinilai berdasarkan kesanggupan atau kerelaan dirinya dalam membantu sesama muslim. Jika mereka menanamkan sifat kasih dan sayang sesama Muslim tanpa ada paksaan maka kebajikan kita sebagai rakyat Muslim lebih terjamin dan terjaga di masa akan datang. Oleh itu, peranan wakaf dan cinta kemanusiaan adalah dua perkara yang menghubungkan antara satu sama lain kerana isu ini amat penting pada masa kini untuk dibincangkan dan dikaji semula dan seharusnya diperkenalkan dengan lebih mendalam di mata masyarakat supaya tiada lagi isu penduduk yang tidak mendapat tempat dalam kebajikan mereka. Sesungguhnya filantropi dalam Islam pada hakikatnya lebih luas kerana berasaskan aqidah Islam yang menghubungkan bukan sahaja sesama manusia tetapi hubungan sesama manusia dipaksakan kepada hubungan cinta kepada Allah SWT.

### RUJUKAN

- Abu Zuhrah, 1972. *Muhadarat fi al-Waqf. Kaherah*. Dar al-Fikr.
- Ahmad Gaus A.F .2008. *Filantropi dalam Masyarakat Islam*. PT Elex Media Komputindo.
- Ahmad Shaiful Anuar Ahmad Shukor , 2015. *Potensi Wakaf Pendidikan Tinggi di Malaysia*. Dewan Bahasa dan Pustaka, Kuala Lumpur.
- Al-Zuhayli, Wahbah, 1987. *Al-Wasaya wa al-Waqf fi al-fiqh al-Islamiy*. Damsyik: Dar al-Fikr.
- Azizan Bahari. (2003). *Menghayati kerja sukarela*. Petaling jaya, Selangor: Qarya Sdn Bhd.
- Home Page | Tokoh Perniagaan | Sulaiman Al Rajhi: Jutawan Islam Yang Kaya Dunia Dan Akhirat. <http://www.usahawan.com/tokoh-perniagaan/sulaiman-al-rajhi-jutawan-islam-yang-kaya-dunia-dan-akhirat.html>
- <http://www.merriamwebster.com/dictionary/philanthropy>, dilihat pada (14/1/2016).
- <http://www.muslimcare.org.my/pengenalan/>.
- [http://www.najahudin.com/index.php?option=com\\_content&view=article&id=17:organisasi-bantuan-dan-khidmat-sukarela-pengalaman-amal-malaysia&catid=22:kertas-kerja&Itemid=10](http://www.najahudin.com/index.php?option=com_content&view=article&id=17:organisasi-bantuan-dan-khidmat-sukarela-pengalaman-amal-malaysia&catid=22:kertas-kerja&Itemid=10)
- <http://www.sinarharian.com.my/mobile/edisi/selangor-kl/lima-projek-hartanah-wakaf-dilancar-1.484446> 12 disember 2015.
- <https://shafiqolbu.wordpress.com/2014/12/15/akaun-harta-milik-khalifah-saidina-uthman-affan-masih-wujud-hingga-kini/>. 7 November 2016.
- <https://www.utusan.com.my/bisnes/ekonomi/al-rajhi-bank-biayai-pusat-pendidikan-di-bawah-yayasan-salam-1.98467>. 2 Jun 2016.
- <https://www.utusan.com.my/pendidikan/kampus/setiap-universiti-awam-digesa-bangunan-potensi-wakaf-1.334243#sthash.NeJunUNQ.dpuf>. 25 Mei 2016.
- <https://www.utusan.com.my/rencana/agama/manfaatkan-harta-wakaf-1.204506> 25 mac 2016
- <https://www.ywm.gov.my/wakaf/pengenalan>.

- Kahf, Monzer, 1998. “*Financing the Development of Awqaf Property*”. Kertas Kerja Seminar Development of Awqaf di Kuala Lumpur, 2-4 March, 1998.
- Razali Othman, 2011. *Pembasmian Kemiskinan: Peranan dan Sumbangan Institusi Wakaf*, dlm. Zakaria Bahari, Fadzila Azni Ahamd dan Roselee Shah Shaharuddin. *Pengurusan Ilmu, Ekonomi dan Pembangunan Berteraskan Islam*. Pulau Pinang: Penerbitan Universiti Sains Malaysia (USM).
- Soelaeman, *Ilmu Sosial Dasar*, (Jakarta: PT.Eresco, 1995), hal. 63.
- Surtahman Kastin & Sanep Ahmad, 2010. *Ekonomi Islam, Dasar dan Amalan*. Kuala Lumpur: Dewan Bahasa dan Pustaka
- Syahnaz Sulaiman, “*Hukum Pembangunan Tanah Wakaf Khas Menurut Perspektif Syarak*” dlm. *Jurnal Muamalat* Jil.1, hlm. 45-64, 2008.
- Yusuf Al-Qardhawi, Terbitan Maktabah Wahbah, Kaherah (1993). *Ciri-Ciri Unggul Masyarakat Islam Yang Kita Idamkan*. Terjemahan Buku 'Malamih Al-Mujtama' Al-Muslim Allazi Nansyuduhu'. Penerbitan Seribu Dinar Sdn Bhd.